

Tiga maut, lima cedera kemalangan tujuh kenderaan di LPT, Bentong

- Oleh HARIS FADILAH AHMAD
- 30 September 2024, 9:58 am



SEBUAH kenderaan remuk antara tujuh kenderaan terbabit kemalangan mengorbankan tiga lelaki dewasa di Kilometer 42, Lebuhraya Pantai Timur di Bentong, Pahang. - FOTO/JBPM PAHANG

BENTONG: Tiga lelaki dewasa maut manakala lima cedera dalam kemalangan membabitkan tujuh buah kenderaan di Kilometer 42, Lebuhraya Pantai Timur (LPT) arah Bentong di sini hari ini.

Penolong Pengarah Bahagian Operasi, Jabatan Bomba dan Penyelamat Malaysia (JBPM) Pahang, Ismail Abdul Ghani berkata, kejadian pada pukul 4.13 pagi itu membabitkan empat kereta, sebuah lori tiga tan, dan dua buah treler dan sebuah lori treler yang terbakar sepenuhnya.

“Setiba di lokasi, Komander Operasi dari Balai Bomba dan Penyelamat (BBP) Bentong, Haznan Basir melaporkan kemalangan itu membabitkan 13 mangsa.

“Tiga orang mangsa yang disahkan oleh kakitangan Kementerian Kesihatan meninggal dunia, iaitu Mohd. Ridzuan Zulkafly, 40, Muhamad Zaimi Shariff, 39, dan Muhammad Azizul Fitrie Md. Zairi, 23,” katanya di sini hari ini.

Menurut Ismail, tiga lagi lelaki dewasa mengalami kecederaan parah, dua perempuan dewasa cedera dan tiga lelaki dewasa serta dua orang wanita dewasa terselamat dalam kejadian itu.

Beliau berkata, seramai lapan anggota dan dua jentera dari BBP Bentong bergegas ke tempat kejadian seurus menerima panggilan kecemasan pada pukul 4.13 pagi.

“Anggota bomba menggunakan dua saluran hos air tangki jentera bomba untuk memadamkan kebakaran sebuah lori treler serta peralatan khas penyelamat ketika melakukan penugasan mengeluarkan mangsa.

“Dua mangsa perempuan dewasa yang cedera dibawa ke Hospital Bentong untuk rawatan lanjut dengan menaiki jentera EMRS. Mangsa lain yang cedera diserahkan kepada petugas Kementerian Kesihatan,” katanya.

Ujarnya, tiga mangsa lelaki dewasa yang meninggal dunia diserahkan kepada pihak polis untuk tindakan selanjutnya. – UTUSAN